



Hercules Alemannus Germaniæ magnæ rex fuit, rebusq; potiebatur anno sexcētesimo septuagesimo quinto post diluuium, cum populus Israel in Aegypto graui seruitute premeretur, atque Mancaleus decimusquartus Assyriorum Monarcha esset. Is multa præclara facinora perpetravit, ac uiuum leonem cathena ligatum passim secum circumduxit, & ipsius leonis imaginem in clypeo habuit, ut inuictum animum ad fortissima queq; opera subeunda ex insignibus demonstraret. Hinc postea Germanis principibus frequens fuit leonis insignia gentilitia usurpare. Erant autem eodem ferè tēpore plures Hercules utpote Lybicus, Celticus, Italicus, & huiusmodi, qui passim fortia sua facta declararunt, quæ postea inscīa posteritas unī assignauit. D. Hieronymus & Eusebius arbitrantur Herculem Alemannum inter reliquos fuisse primum. Nam iustitia & fortitudine multas Barbarorum gentes in ordinem redegit, & legibus uiuere assuefecit. Cum itaq; summa æquitate res Germanorum administrasset, ab ñsdem post mortem inter deos relatus est.